



Мэбета вадава" ила' панан' етри' мэква"!

НЯРЪЯНА

НЭРМ



№ 39 (5209)
2024 по'
сентябрь иры'
28 яля

СУББОТА

ГАЗЕТА 1931 ПО'
АПРЕЛЬ ИРЫ' ЮКАД ВАТА
ХАСАВАЮДИМДЕЙ
ЯЛЯХАД НУДИБЕРҢА

СИ" ИВ ЯЛЯХАНА
НОПОЙ" СЕРТАБИВА"

Российская Федерация Ямало-Ненецкий автономный округ



Сидянт. С. Салиндер гэдэбтавы

Манзаяда –
иланда саир"

4

Нерняны яляндо' е"эмня

**Тодо' яхат товы" илебей
ненэця" Яр Салыхана
форуман' ма"люңаць.
Пыдо' сертаванда
манзаидо' (проектадо')
яромбэй няхато'
манэ"лабтамбиць.
Тикы' е"эмня грант
ня"марпиць. Тада сидя
яля форумдо' миңась.**

Няхар" яля' ямбан' пыдо' сертавы манзаидо' няхато' манэ"лабтамбавы". Тикы' хавна тамна ңани" ехэрана иңуд сертабаван' сидто' тохоламбавы". Тэв"махадандо' нидо' торомдамба сянаковы". Тад пуна нябимдей яляханандо' проектадо' ваде"мы". Хусувэндо' харта хардахананда, яхананда тидхалембаванзъ тасламбавыда. Мале няхаромдэй яляхана хибя нерня" ха"амва пунумась. Юкад вата ңопой ненэця" тэравы". Ямалхадна" няхар" ненэй нява" грант ня"амавы". Тикы": Казымкина Милена ненэй не, Пахомова Наталья, Тасманова Анастасия. Сертавы манзаидо' яханато' ңарка таром' ха"авраңгу".

Нини" поңгана мэвани мальҕана мале сян нями лахана ня"ңадамзъ. Нюрте"э' Самбургхад товы Пахомова Натальям' индя ядэробцо" нямна хонрадамзъ. Пыда вадада тарцясь:

–Пыхыдами грантм' ня"муванзъ тосадамзъ. Лаханавани мальҕана сёнзьяни мюня мэйрыдамзъ. Яханана" илебей нина" тохоламбаңгува". Сянакова' яляхана хано" масеро сертабаңгува". Тамна ңани" ңавори сэдыбаңгува"ма". Теда' Яр-Салян' товами ихиняни сава. Ехэрана ям', ненэцие манэ"ңад"ма. Ңоб" иңудм' мэтанини" ня саць тарана серона" таслава".

Пяку" я' няд товы Милена Казымкина индя ядэробцо тарем' хэтыдась:

–Мань грантм' ня"муванзъ нидамзъ пунрө". Тедахав саць тарана серми ма"лев". Ими таңга! Ңули" маямбидм! Тар-

ка Салыханани' ңацекы тара тохоламбаңгудм'. Тикы е"эмня тараванда ңавори тэмдаңгудм'.

Нито' проект" пэрман' няби" ңобт' ма"лөхоя" нянандо' ңамгэ таравам' ваде"мы". Тая' товы" илебей ненэцие" поңгана тыретана

ва"лөй ненэй не нява", Дарья Салиндерм' ядабтадамзъ. Нями тэри ңоб", сидя вадам' мээмдавэй нивась ңэдара". Хуримна хонрамбивась. Пыда тарем' мась:

–Яр - Салян' нюртей товами,

мань тэри пысэяваць. Тюку ян' тэворп", манэ"манда ңока ңэвы, ненэйвана ненэциедо' пачо. Илебей" ненэця" тарем' ма"лөва ңули" сава. Ңока тарана ңамгэм' манэ"ңадм'. Тарем' манзараван' харвана"

ңока", ханяңыдо' тандая' тохода". Мань ңод" тохолкудамзъ. Тэв"махадана" няхар" мэлвахана мэваць. Ңопой мэлвахана нюдямбой хардахана тараванда серо тохоламбиць, соя"ма паңгадо' ханяд ңэвам' тасламбиць, тамна ңамгэм' пирмамдо ваде"ңаць. Мань тарем' хамедав, проектм' серта таслаб", ңоб" нерня' минре тара.

Тюку форум илебей ненэцие" няю' нюртей тидхальцяңэ тарая. Саць пиртидо' несэй серо тасламбуванзъ ма"люрҗая", ёто' няна тараванда манзаи нерня' минрея".

Руфина Окоэтэто'
падвы



Сидянт. Окоэтэто' гэдэбтавы



Едэй няд”ма”

Тикы нямна мале жока пад-наваць, юн” ханяримна соць. Теда’ јани’ тензебтехэва”. Та’ ервона” вымна тиртя јанохона јэдалёрјаць. Мюсерта ненэ-цие јамгэ нянандо’ таравам’ тидпой хонрамбидонзь. Вэба’ ирыхына ненэся јамгэ јэрм’ терхана тарава пунумась.

Тикы” ма”лавы” няд”мидо’ «Дорожной карта»јэ вадетана” мю’ пэръядо’. Тарця вадам’ едэй няд”ми” нямна намдаваць.

Тад нерня’ хабарталваха-на ня”марпада тыто’ јамза мирерта. Јэвахы, хадерцяда јамза тет юр” самляјг ю” еся” јэ”мяхаданда самляјг јурм-ня ня”марпајгудо’. Нябим’ сидя юр” самляјг ю” есявна

јоб” килада ханда. Мале тюку јэрэ’ едэй мирмня ты’ јамзи тэмдабајгудо’. Тыто’ пена” нянандо’ хаеван’ харвани” нямна јани’ хара” јадимыць.

Ты’ пардон” лабтэй” јани’ југамдајгудо’. Јамгэ нянандо’ тарава’ нямна ты пэртя” харто’ лахана-навыць. Лабтэйм’ едэй пардонхана тердејгудо’. Јани по-хона јани’ ты’ пардон’ аптечка ня”марпајгу”. Јокханда јопой ёнаркад вата мяд’ терха” пардон ми”манзь пэрја”

Тохолкова’ серо” нямна јани’ сава юн” таниявыць. Хойхана вадёдана” јацеки” невхы по” тотрев’ «0» клас-



Сидяјг: М.Јр гадтавы”

сахана тохолкода”. Тарем’ 1 классан’ хэб”нандо’ мале серо теневајгу”, јани нито’ пирувна тохолкода”. Илебей ненэцие” јобтики нивыдонзь юр”. Нюртей по’ тохолкованзь хэняха” (хибя” небянадо’, нисянадо’ вымна тэхэна мюсерја”) няд”ма’ есядамдо’ јадимдембајгу”.

Тикы’ хавна «Чумовой капитал» нямна јани’ јоб” сава

вадам’ намдаваць. Ма”нисям”, теда’ ея’ мядм’ нябимдей нюм’ хо”махад тамбајгудо’. Јахат няхар” нюсавэй мяд’ терари” тарцям’ ня”марпа пирјаць. Тикахана выјгана паллёда мя” тамна жокамдана”. Илебей ненэця” мер’ харто’ иле пэјгајгуд”.

М.Јр’ падвы

Мирци” юристхат няд”мам’ хојгу”

Јамал’ тигэвна илена тодо тэнз” јэрм’ тер” тоенана”, тасла я”амна” серото’ нямна юристхат хонарко пирјадо’. Тикы’ е”эмня есям’ ни” салдамбајгу”. Сидто’ мирци” табедаягу”, нядаягу”.

Российской Федерация Јэвахы вато’ сер’ тэри хибяри” тарця няд”мам’ мэць нидо’ пирас”. Мирци” табекодамдо’ шорта” закон’ сер’ таславы”: хибям’ нядаягудо”, хибям’ нидо’.

2023 похона невхы илајгад Јамал’ терјэ толёда” појгад јокханда 516 ненэць юристхат табекурмы”. Тюку

похона мале 313 яна” тер няд”мам’ ховы.

Тасламбавы серодо’ хуркари”. Хибяхав пенсиянда есям’ ня”ма я”амвы, тамна јани” иле мяци” хаёвы”, јани хибяхавм’ манзаянда е”эмня недбяси” хаёвы”.

Нядаягода” юрист” Ты пэрти”, Халям’ хадабади” яляхана харто’ ненэцяјг” јэдалёрмы”. Тарем’ вытер”, харад’ тер” нядандо’ хонарко пирмэдо’.

Тикы’ хавна саць тараванда мальјгана видео-конференц-связь’ мутрам’ мэць јани’ лахана пирјадо’. Ханярина хубта

яхана мэпто’ јод”, маянд’ еремы ненэцям’ тидхалејгудо’, тирний-вана табедаягудо’.

Тарця няд”ма’ нямна хонравандара” таниябта, Колл-центр’ манзаранаха” тюку телефонувна лаханада”:

8-800-101-98-75.

Ненадо падро сайтхандо’ јэдабта тарабта, адресдо’ ти:

<https://urburo.yanao.ru>.

Ненэй вадан’
Г. Окоэтто’ падвы

Хэхэ’ мядм’ НЭВЫ”

Салаягардаханана” тандая’ јарка хэхэ’ мядм’ нэць. Россия’ тигэвна Луца” хэхэ’ мяд” јэвахана мэна патриарх Кирилл турјась. Вэба’ иры’ юкад вата нябимдей яляхана Пресвятой’ Богородица’ соя”ма яляјэ ваде”јадо’. Тиканда округна” ерјй харад’ тер” сидя тарана ненадо серм’ мэ”мы”.

Јамална” јэвахана мэна ервава” јамгэ’ е”эмня собор’ таравам’ тарем’ ваде”мэда:

–Тикы сер’ Јамална”, Салејгардана” юнм’ тамна тяха’ минрева’ няю’ таславы, илајганана” саць ненадојэ толы. Јули” сава ян’ палмэдо’, марна” харад’ појгад хэхэ’ мя” јаха’ јади. Мимбавандо’ мальјгана савовна сертавадо’.

Соборан” туртари” е”эмня ни тарајгу”. Пеляда православной гимназия јэјгу, хэхэ’ мят’ јадэрта” јацеки” тохолкода”. Маркнана” илена” тарця ненадо ялям’ ёльце саву”мэдо’.

Р. Јокдэтта’ падвы

Тэдамдо’ тэмдајгу”

Тюку илајгана харе” манзаям’ минрева’ е”эмня хуркари няд”ми јадимдемби”. Тикыд ненэсянда серм’ тидхалембава’ няю’ сава таром’ ха”аврамби”, јодь ханзер” сертабава јэвамда тенева серо”ја. Појганандо’ маня” јэрм’ тер” нина” јани’ тания”.

Хахаяда яля’ ты пэрти” серо минрена департаментхад юнм’ намдаваць. Харе” манзаидо’ минрени” појгана грант’ еся

няд”мајэ пирдырмахана тярпавыць. Тикадо’ «Агростартап» грант’ есяјэ ваде”ядо’. Тарем’ ненэця” тајга манзаямдо’ нерня’ минрејгу”, нина” мат” миллион есям’ ня”амвы”.

Тюку по’ няд”ма’ есян’ харвани” појгана самляјг проект ты пэрма’ нямна јэвыць. Тет ты пэртя” грант’ еся ня”амвыць. Пыдо’ мал’ Тасу’ яв тер” јэвыць. Хусувэдо’ мат” миллион есям’ е”эймы. Вануйто Эдуард Ванюсевич, Вануйто Ва-

дим Ванюсевич, Вануйто Денис Начович, Вануйто Олег Начович Паюте”э’ вымна мюсерја”. Невхы иринато’ недарми тамна нёда”. Хусувэдо’ харта КФХсавэй. Есяханато’ тэдамдо’ тэмдаван’ харва”.

Программадо’ 2019 поход манзара, тајок по’ ямбан’ 24 ненэцям’ нядавыць, појганандо’ юкад вата јоб” ты пэртя.

Марина Марюй’ падвы


Иван ири' лаханакко"

Хусувэй ненэць' нюдя нэвандо' мальгана сямьхат нерденаңэ намдвыда – ңарка нита ваде"мы" лаханакко". Тикына" хуркари" нэсеты", я' сармик" нямна, невхы илма" ваде"та", сава серк" сидна" тохоламбада", тамна ңани". Ёльце харвабтасетына".

Едэй илаңгана ненэй лаханакко" е"эйңэ ңацекына" мутры няд"мяць ңули" несэй лаханакко тенева". Небянадо' ненэй лаханаккодамдо' книгарихиттолапирңа". Ңокамбой пелядо' нюдя нюкцяхато' толавандадамдо' хось я"амсеты". Тарцява" тянё. Сидто' нядаба «Красный чум» нюбета центр едэй толаңго книгам' сертавы". Таняна манзарана" Ямал' ңацекы" е"эмня Иван Григорьевич Истомин' лаханакко" книгам' несэймдавы".

Няхар" хэбицяко лаханакко" луца вадахад ненэй вадан' Светлана Тусида падвыда. Падга"мидо' сомбовна падгаңгурга" сертавыдо'. Тикы" Зоя Худи, Анастасия Хороля, Дарья Вануйто.

Тарця юнм' яна" тер" саву"мэдо'.



Сидяңг: ЦКИ «Красный Чум» сертавы"

«Ёльце пэдавада"! Вадам' лэтрамбава, тохоламбава' серкана няд"маңэ тараңгу!, – школахана ңацекы тохоламбада Пандо Ольга Николаевна лахана. «Нерняри' ңада». Сава манзаям' сертавада"! Ңацекы" е"эмня ёльце тарана сер"!», – ңани ненэця" падна".

Светлана Ивановна паднаванда

нямна тарем' ибедорңа: «Ңавнанда выңгана ненэй мяканани илевани мальгана хадами лаханаккоадава" вадецеты. Теда' мань харад' терадм'. Нюхуюни' луца" илам' мэ"ңаха. Ңояк таңы ныланавани сер' вынд' тэворпана" ирина-ни илам' манэцетыхи'. Хадади' лаханаккодамди' вадецеты. Пыди' ңули" маймбасетыхи'. Теда' мань сини тотрев' харад' илам' мэ"та" илебей мяд' тер" ңока". Нюхото' ңобтики ненэй лаханакко мэ"ман' харва". Ңадьбяни е"эмнандо' Иван Истомин' падвы хэбицяко лаханакко ненэй вадавна падынась. Харто' ңацекэхэто' толабаңгудо'. Школахана манзарана" ненэй вада' урокаха"на ңобтики мэць пиртыдо».

Ңокханда Ямал' тиңгэвна интернатха"на илена ңацекэхэ" самляңг юр" толаңгобцьм' ңэдабтаңгу". Тодо харад" библиотекаха"на ңани' таяңгу". Таянд толаңгован' харвана" ня"ма пиртадо'.

Г. Окоэтто' падвы

«Лабтэйко» ңэдалёрта

Сеяха' школахана «Лабтэйко» нюбета театр тая. Юнда мале няхар" по' ямбан' Ямал' тиңгэвна ханяри' тэворңа. Интернатхана илена" вы' тер" ңацекы" тохолковандо' пуд тая' ядэрңа", лаханакко мэць тоходана", ненэй иле"мядрев' сертабидо'. Поңганандо' сямьхат сававна лаханана" не ңацекы", хасава ңацекы" мэ". Лаханаккодо' тид" манэ-лабтамбидо'.

Сидто' тидхалембада – Клавдия Юрьевна Салиндер. Ңарка нямдо' няць мале ңока лаханакко" ңадимдевы". Тарця серканандо'

тохолкода" ңацекы" ёльце варемдо' мэ"ңа". Хибяхавадо' тэнякоңэ тарасеты. Ңани' хибяхав пинхад тэваси, писяко, вэнеко ңэңгу. Лаханакондо' сер' ембадэбто', тамнанир хамедаңгу", пухуцякоңэ, вэсакоцяңэ ханя-ңэдо' таранақы?


Манэ"лабтамбавы" лаханаккодо' тарця": «Тэняко няби тэваси», «Харад' хоркэця», «Вэнеко нядамда по», «Писяко», тамна ңани".

Теда' нядандо' ңани' едэй юн тось. Ңэрёй ныланавандо' мальгана Салемал' ёльцянд' ңэдалаңгуд". Таяна тохолкода няхато' лаханакко ваде"та".

Сиддо' нянандо' манзаранидо' нядабтаңгу". Ңацекы" нито' сякана пыхыдадо' манэ"лабтаңгу", вадавнандо' лаханаңгу", теневабодо' тамна ңокамдаңгу". Едэй сава нядамдо' торомдаңгу".

«Лабтэйко театрм' минрена" тарця серка"на мале торомбэй". Маси" Салемалхана илена" ңацекэця" нито' тотрев' ңобтики тарем' лаханакко мэць таслаңгудо'. Тикы" е"эмня харвабцори тара нив", ңарка нито' няд"масипой" ңани' вуни" хаёд".

Г. Кинчина' падвы



Сидяңг: К.Салиндерхад ханавы

ханзо мохомбава ңаябад тэтнава падева малкода пур"

җэсы ниберё нядэна пуно ңавка елдя

Сидяңг: М.Яр' тадтавы

ту хойрё якэ лымбад лабта нядэко мюсерма мюд

Тев ёльцяңана ты" ёльце сомбой ңэсеты". Тэри маниебць". Таредо' ливарңа". Нямдодо' ңарка". Ңэдалёб" ңод" мэбе"ңа".

Манзаямда ваде"ңась

Хэвы си"ив яляхана Казань хардахана ненадо сер" ңась. Таяна Ңарка Россияна" тиңгы яха"на харе" вадавнандо' ңацекы тохоламбада" ма"люрңаць. Пыдо' ненадо пирдырмам' мэ"ңаць. Ямалхадна" Приуральской районхы Белоярск' няд Клавдия Филипова ңэдалёрңась. Пыда сидта ңобтики ненадумдавыць.

Тюку по' юркад вата ңацекы тохоламбада харе" вадавнандо' теневабодо' ңадимдембавы". Маня" яна" тер' нява" Клавдия Филипповна сынакубц

манэ"лабтамбавы. Ңэрм яхана илена ңацекы" ханзер" вадэдавам' няхата ваде"мы. Пыда юкад вата сидя по' ямбан' нюдяко ңацекэхэ"на Белоярск' хардахана манзара. Ңэдалёромита нямна тарця вадам' хэтась:

Мань тарем' тасламбив, ңацекы" вадамдо' ся наковандо' сер' тохоламбидо'. Няхар" яля' сер' няхатана" саць ңока тарана серо манэ"ңава", намдава". Ихинани тикыд" манзаяхана-ни ңарка няд"ма" ңэңгу".

Солне Ңокэй' падвы

Ѓацекыда – иланда саир'

Вэба' иры' 27 яля – нюдя ꙗцекэхэ'на манзарани' яля. Россия' ꙗрдавна е'эмнандо' сава вади мэ'џава'. Пыдо' сямьхат тарана серм' минре', пили' нерденаџэ вадёдана ꙗцекы яля' няю' тидхалемби', табедамбидо', тохоламбидо', нядабидо'.

Ѓопой тарця ненадо серм' минрена – Салиндер Светлана Вадимовна. Тандаярка «Няръяна Ѓэрм» газетава' толабада ненэцие' е'эмня иланда, манзаянда нямна лаханась.

-Сян по' ямбан' нюдя ꙗцекэхэ'на манзаран'?

- Салехардахана ꙗэда колледжм' 2002 похона ёльце'махадани мале сидя юкад вата по' ямбан' манзарадм'. Таняна нюдя ꙗцекы тохоламбадаџэ няхар' по тохолкурџадамзь. Тикы' пуд Ѓыд хардахана интернатхана манзара пэйваць. Нюртей



Сидялг: cheburashka-nyuda.yanao.ru няд ханавы

рамба практикамдо' мэ'манзь садикханда' турцеты'?

- Тарця манзаява' џани танясеты. Мань тидхалембавэми – Ѓыд хардана' тер, Кристина Пандо. Нерняџы илаџгананда мэ'манда манзаямда Нядаџгардахана Ямальской многопрофильной колледжхана тохоламбидась. Ѓадбьята практикамда тюкона мэць тасладась. Тохолковамда ёльце'махаданда нянана' манзарась. Ѓули' пэдава илебей некоця.

- Ненэй манзаянд хавна тамна хуркари' серка'на тарасетын'?

- Россия яна', округна' серо ня'амбади тэрабавана' мальџгана нядаџгосетыдм'. Тэраџгова' яна' толыр' – 522-й. Нермбэртяна'

марцьхэџэ тарадм'. Мюсерта'нина' мер' тэраџгосеты', ꙗсыхыто' тиртя џанохона тэворцетыва'. Ненэця' сяхаџгарт' пуны' нисеты' џа'. Тарем' ꙗдалёро'мини мальџгана џахат интернатхана тохоламбавы ꙗцекыни манэ'цетыдм'. Малехарто' нюсавэй'. Невхы иринато' илам' нёда', нюкцидо' вадаби', тыдо' лэтамби', халям' хадаби'. Харни тохолко нини' манэць џани' маймбасетыдм'. Ихинани џули' сава ꙗсеты, џарка яни е'эмня тарана манзаям' минревани хавна, џока нини' мякана мядонда' то'олхадм' ꙗсетыдм'. Сава иџукана, илебядё хардан' тэвсетыдм'.

Тикы' хавна мяни тер няць Салля яв' вархана таџы нумгана ненэй мя'ма' мярсетыва'.

Та' таняна илесетыва', џодядава' ма'ламбасетыва'. Небями сэдорасеты. Ханяџэхэна мал', не нини' мяд тер няць ядембадаё' ня ꙗдалёрцетыва', џобкана ныланасетыва'.

Не нюхуюни' Алиса няби Арина Ѓыд' школахана тохолкурџаха'. Ѓанине не нями, Лициана не мяџгми ꙗцекы тохоламбадаџэ тараџаха'. Тадри' школана' 90 пода џэџгу. Тикы' ненадо ялян' хамеку'.

«Манзаями – харни ивнани тэравэми, тарода џарка. Илми тюкона џа, няданда передм'. Хусувэй яля' нёлёкоця ꙗцекы' вабц намдорџадм'. Пыдо' ими савумдамби'. Ѓобкарт вэва иџуто' яџгу. Маня' џарка ненэцяџэ нядандо' џобтики хусувэй ялян' маймба тоходанава'. Мань сидто' харвабтадм'. Ѓадбьяни тюкона манзарадм'. Ханяџэхэна саџговопата џод', минрена серми саву'џав, пирџав», – тарем' инда сер' ꙗэда манзаянда нямна Светлана Вадимовна лахана.



похо'на тохоламбавы, тидхалембавы ꙗцекыни' мале џарка ненэця'. Теда' «Чебурашка» нубета садикхана манзарадм'. Ѓокханда тет мэва' няхар' потна ꙗцекэци школан' хэвандо' ёльцянд' тохоламбинась. Сямьхат нюртейџэ нянани мэвы' тадри' школахана тохолковамдо' ёльцеџгу'.

-Ѓыд хардахананда' ты пэрти', нядэна' ненэцие' ню школан' хэвандо' нерцона тохоламбасетыда'?

-Пыдо' е'эмняндо' 2015 похона яџга программам' пададамзь. «Группа выходного дня» нубе'џа. Хардан' ха'морта' ты пэрти' ꙗцекыдо' тэврамбасеты'. Си'ив яляхана џопой яџорэй турцеты'. Нисянато', небянато' хардахана мэва' мальџгана ныланава' яляхана сидто' тохоламбасетыва'. Тамна џопой группова' тания – «Малышок». Мюсерта' ненэцие' мякана манзара. Сямьхат нерденаџэ ꙗцекы тохоламбадаџэ тодо ꙗсыхы'на Елена Худи, Виктория Яунгад, Елена Салиндер тараць. Ѓэсы' ꙗцекы мал' џобт' ма'лахая, паднабцие ня'амба, толырм' хамедам-

ба тохоламбавыдо', тарана теневабцудо' џокамдамбавы'. Тарем' вы' теркоця' школан' хэвандо' мальџгана хардахана илена няхатато' ни' хаор', пирувнандо' иџудоџа'.

-Ханярина тохолкода' студент' теневабцудо' мэй-



Сидялг: С. Салиндер ꙗэдабавы

Тарана пэндъя"



Приуральской районхана еся сехэры' ямб' сер' ненэцие" мюселаби" ниня мале сян пэндъя" џа". Луца" факторияџэ ваде"ядо'. Сехэрым' мада"махадандо' тэри лабкаха" ядэрць пирџа". Ѓопойдо' «Стёпина»м' нубе"џа. Тэхэна мэна ненэця" ервамда ёльце сававна теневадо'. Таџота, сырита сехэрэдо' тая' ни тухур". Пэндъям' Владимир Алексеевич Стёпин ня"амбида. Невхы 2002 поход тидхалембида. Харта џавнанд Брянск мар' няд илебей ненэцяџэ товы.

Пэндъядо' мале џарка, лабкадо' тая. Ѓули" еся сехэры' ядхана џа. Лабкаханандо' ся-хари тобат џод", хусувэй тарана џамгэ" тая". Саць ни" мирес". Фактория' сидя хэвувна та' нядэна" мяд" хаюрџа". Тенева", лабкахана хусувэй џамгэм' хоџгу". Тамна сеџгалава' мята тая. Хусувэй яля хибяхав турџа.

Владимир Алексеевич ненэцие сававна теневада. Ты пэртя" няндо' нямна яля' ня џэда вадари мэ"џа". Пыда џод" хибяхартм' тэри ни џэдарамию". Нюсавэй, иринасавэй теневада.

Няндо' тэвормана" мальџгана Байдарацкии совхоз' хасаваюдимдей џэсы' тер" џаврандаць. Пыдо' тая тэворпато' лапкарин' ни" мий". Пу-дана мале сян по еся хано

мэта" хойхана џокама". Тикыд есяндо' тахараб", тухуна пиремба серо"џа". Тарцям' факторияхана хомби".

Еся сэдыбада Михаил тарем' мась:
– Сельбя' няна хусувэй яля' хибяхав турџа, теда' квадроцикл мэта џока"ма. Тахаџгабато' ханяџэхэна

Тэхэна мэна ненэця" сяхаринда харад' хэвхана ни мюсер". Ѓыхы ян' мюселмандо' нерня пыдо' џокамбовна тарана џамгэдамдо' тэмдаби". Тарем' џод" техэ яхандо' тэмдосэйдод' ни" тэвор". Ѓадьбята џавнанда тамна нярџяна луци" мальџгэхэд пэндъя" тая". Тикыд мюсерта ненэцяџгана тарана няд"ма". Ханзер" манзаравамдо' ервона" маниедо', тарабата тидхалембидо'. Тандаярка' тая' Законодательной Собранияна" депутат, Эдуард Яунгад џэдалёрџась. Маня" редакцияна" тер" џани' ядэрџаць.

Юрибей" факториям' ня"амби. Хаяда яля' сидя вездеходда џаварм' тераць тая' џэдалаванзь пэрџась. Пыда тарем' мась:

– Тюкона мюсерта ненэцие мал' сававна теневад. Ханяџэхэна нянандо' џамгэ таравам' таминдо' няни тидпой лахана". Маня" тэврамбина". Ѓодь няд"мадамдо' пюнахав" няна" турцеты". Хибяхартамдо' тэри нива" џэдарамию". Тарем' џобкана џока по' сензувна илева", манзарава".

Еся' сехэрэвна тамна тыха' џэдаламахадана" џани' џоб" факториям' ховаць. Тикахав «Паюта» хабарталва' хэвхана џэвысь. «Ензор-яха» пэндъяха'



хардада мале џока џэвысь. Тая' няна няньм' ябцыби", џацекы школахана тохоламби", лекар' мято' манзара. Тарабата мерета еся хан' бензинад џани' тэмда пирџа".

Тев' ёльцяџгана ты пэртяха"на тарця фактория" џули" тара". Пыдо' ханото' терсяло"махад тарана џавэдамдо' тэмдаби". Пуна' тыха' мюсел"махадандо' салабанда няџоро"ма' џэсонд' хардан' ни" тэворт".

парадамба тара", хойхана тарцяр яџгу, џадьбята пили" манзаями тая. Факторияхана мирци" сертабин, хибяхартад есям' нидм' ханла". Тикахад ты пэртя" тенева", сяхари' тахарабто', сидто' етри' тюкохона нядаџгу".

Владимир Алексеевич тамна Ямальской районхана «Усть-

Марина Ярой' падвы



Пиди нэхэта", нюңк ңашки" Самбулдан ңомаш". Ха"мудяш", вядкудоляш", шудвидяш", тупкам ңятпиш". Самбулдахана Северное многоборьең дет тондота Пуровский' район Первенствам мэнаш". Мянадмантуң мэт дюл спортсмен" тоңаш". Самбулдахана дидина" спортсмену" камна Талдахат, Кадподкат мэна" тадымэнаш". Шана'кота" хамплянк спортхана, Северное многоборьең дет ңайта", пытатуң конулпиш". Няхал дяляң мянадыш".

Пытатуң конулпиш"

Пуровский' районхана няхал дюлкат ва'та ңашки" Северный' многоборьең канңа". Ха"модьш, вядкудодьш, шудвидьш, тупкам ңятпеш мянадмам хомана чедимяңа". Нельчезей дяляханантоң спортсмены" пям няампеш шудвидяш". Ңуп, шича, няхал – таң кун километраң дльшат пытатуң конулпиш".

Чики соревнованитуң пут тупкам ңятпеш мянадыш". Мяндыш мэта тупка шетшапта ңотнаң, куптаң монана ниңа. Талям куки мянадыш" ңайтапечитуң тупшитуң" пуңяң тошту". Нимимты дяляхана спортсмены" няхал ха"амхана ха"модьш мянадыш". Чупей нюңкмана хамудяш". Няхал ха"амхана мянадмантуң пут ңупкэйван ңамтамы кану" ха"мудпеш чепьнаш". Няхамты дяляханантоң мянадыш" вядкудодьш чепьнаш". Няляң паңк вядкулпиш". Кимя шан метрахана кун патдата няляң паңк вядкулпеш мянадмам, по"омнатуң таслайтоньш.

Северное многоборьең тондота спорт' неньшад ниңа, талям талдыша соревнованихина четыдың мянадыш тохотана ңашкиуде" тэтнашту". Каса" ңашки" поңкна ни ңашки" мянадыш".



Татма: Андрей Пяк таттамыта

Мяндыш хитамахататоң хомана шана'комы", ңайвахай местам канамы" тотуң патал – диплом, медаль няамнаш". Ңокна мянадыш" поңкна няхамты местам Талдахат мэна" канаңатуң.

Нимимты местан Кадпод чел" спортсмену" команда каамдыт. Ңайвахай местам Самбулдахат мэна команда канаңата. Хомана мянадыш" спортсмены" Ямална сборнадың тондоты". Тай"ня навэт ңалка соревнованихи" кайны", таньняна мянадмантуң мэт.

Андрей Пяк патмы

ОБЪЯВЛЕНИЕ

СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
8(902)81-6-11-90
ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
5 000 000 Р
ЕДИНОВРЕМЕННАЯ ВЫПЛАТА
2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р
ДОПОЛНИТЕЛЬНЫЕ
ДО 120 000 Р

400 000 Р
МЕЖСЛУЖБОВЫЕ
ОТРАЖАЮЩИЕ

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т.Р. СЕРЖАНТ ОТ 232 Т.Р. ПРАПОРЩИК ОТ 292 Т.Р.

Ненэй вадавна манэ"тына"

Сяхаринда вынд' тэворпана" нюсавэй ненэцие" мякана ңацекы" луца вадавна ңэда мультфильм маниесеты". Тарем' мале нюдя ңэ"дахандо' естри' луца вадарим' намдорңа". Янамбовна небяңдо', нисяңдо' вадам' юрыбидо'. Тарця ненэцие нядава' е"эмня ненэй ненэця' няхаюна" ёльце тарана серм' ңадимдевэхэнзэ.

Надым хардахана илена Сэротэтто Илья пухуцянда ня' ңацекы" теневаңа «Ми-ми-мишки» мультсериалм' ненэй вадавна сертабиди'. Тикы сер' е"эмня грантм' ня"амавэхэ'. Манзаяхананди' тараванда ңавори тэмдавэхэ'. Ненэй вадам' сававна теневаңи" ня' ңобкана сертабавэдо'. Сидя няхаюди' мультим' вахалалтамбавэхэ'. Мале си"ив сериям' падвы".

Тад пуна ңацекы" интернет' мутрам' няд"мяць «Ми-ми-мишки» маниеңгудо".

Хой' няна илена" интернетсяда" «облачный» ресурсахана хомбаңгудо'. Хардахана вадэдаңа" ненэй ңацекы" ңоб тарем' вадамдо' нидо' юрыбаңгу". Неркаги Елена ма"нив":

– Теда' ханяңы" выңгана илена" нюхунато' луца вадавна лаханакурңа". Ненэця' вадам' мэць тара, ңули" нивандо' юрвандо' е"эмня тарця харе" вадавна ңэда ңацекы харвобтана мультсериал няд"маңэ тараңгу.

Тамна ңани" тэвадана" серканато' нядаңгода нидо' ңокамдаңгудо'. Тадри' «Смешарики» няби «Барбоскины» мультсериалм' ңани' ненэй вадавна падаңгудо'.

Тарця тарана иңут' ңахакуна хама серо"мы". Мэкад луца лаханако тамна ңацекы" хавна ңарка ненэця" манэ"сартыдо'. Ңобкана ңамдэ ненэй вадавна лаханакурць, тасалкурць, вадина" хамедамба тохолкода".

Р. Окоэтто' падвы

Тадебя џацеки



Тюку лаханаком'
«Ямидхы» лаханаку»» нюбета

**толаџгобцьџгад е'эмнанда» ханаваць. Яр
Василий Дмитриевич 1976 похона ваде'мэда.
Тамальџгана Казимир Изидорович Лабанаускас
Таймыр' няна ненэцяџгат џока лаханаком' падвы.
Лаханавандо' сер' падыбавыда. Толаџгобта», Енся'
няна мюсерта» нина» вабцм' намдана то'олхада»
џэџгуда».**

Лаханакоми манма: џавнанта хунананта ю» тунгу» илевы». Тыду џока нивы» џа», няхар» юрмян. Ю» тунгу» яв' хэвхана ёрмы», халыком' пэрмы». Ю» тунгус» няна џоб тунгус џачекэча илевы, ю» потакоча џачеки. Нисяда, небяда юџгувэхэ'. Еваку џачеки џадсуй паны мэчьтавы.

Сяны џэпту џод» ю» тунгу» ма»:

–Хуняна ёрманчь хантава». Няна» ту»! Сидна» нядаџгу» нинав.

Тунгус џачекэр ма:

–Тоходм'.

Чи, ю» тунгу» ёрманчь ханя» хань». Пока халыам хада». Сельбя иры џэдакы, нумда мер пэвсюворџа. Нумда пэвсюмчь ю» тунгу» ма»:

–Чуку яляхана хадавэва» халыава» џоканю». Чеда хучер» мякна» тэвраџгуна»? Пелду яв' вархана хаёрџая». Тад џани' тутавама», няби пелям' ханаџгува».

Пачекэн' ма» ним:

–Пыдар яв' вархана хаюдан, халэна» нинав лэтрамбаџгу». Амгэв сармик тоховапта, вэнолтаин.

Ю» тунгу» мяканту хая». Еваку џачеки чикана хаи, яв' вархана. Халэду лэтрамбю» нив. Тад хонарэй». Юдерпананта џоб лаханана лахнаараха:

–Еваку џачеки, чуку яв' вархана пон нён мы»! Юркад», хань»! Хэбнант маџгдаба тунгус' мядм' хоџгун. Чикана иле»!

Еваку џачеки сиды, сэвда няџгарџа – хибярт юџгу. Ихнянта ма: «Хибя лаханаса юдерпанани? Тарем' малхась: чуку яхад хэб» саво. Пэя, чедав хантадм'. Маџгдаба тунгус' мядм' поџгудм'».

Еваку џачеки сиды, сэвда няџгарџа – хибярт юџгу. Ихнянта ма: «Хибя лаханаса юдерпанани? Тарем' малхась: чуку яхад хэб» саво. Пэя, чедав хантадм'. Маџгдаба тунгус' мядм' поџгудм'».



Еваку џачеки хая, џоб халыком' нямба хая. Сянири хунари мимбата џод» маџгдаба мядикоча' нимня џадимья. Тыду амгэрт юџгу», мяд' хэвхана няхарсян ханкочари. Яха' вархана џанокоча џади. Еваку џачеки халыкомта нё хэван' мода, мят' чу. Мякана вэсакохо', пухучаха' илевэхэ'. Тунгус паны мэмэхэ', сяквашаюди' џани падарчихи'.

Вэсаку мамононта:

–Пухучёв, хибяхав тувы, маяндорта џачекэча џэрханю». Чикы явна тоява. Еваку џачеки вав' ни' џамды».

Тунгус вэсаку ма:

–Ненэй џамдаковами выни тания». Ядембада евэйкорим' џорьин. Нер» поџгарпанани хадавэми џопойри халыкоча.

Еваку џачеки ма:

–Ирикэ», мань халыкоми тания.

Мят' чувани нёрчю нё' хэван' мовась. Чедав чикыми пирейва».

Тад пиреду. Пормахаданту хонэйд». Еваку џачекэр вэсаконт сий няна хуны. Пэџада саво, тонда таниянакы. Хонёбата џод» еваку џачеки пи ямпхана тунгус' сёвна пили» самбадорџа, самбадортараха.

Хуркан нумда ялэма. Пухучаха', вэсакохо' юркьяха'. Еваку џачеки тамна хуны. Вэсакор џани џорчь ёльчемадант поџгаханта хая. Яля' ямбан' поџгарџа. Сенеинанта хадабадада џоб, сидя халыку џэсьты, чедав наџэдя џанокочамта халыхана пандада. Яха' варан' варета тэвы», тад чёрей»:

–Пухучёв, мерку тальняку ту»! Чедав хадавэми џоканю». Еваку нюкчаени яб ни џа»? Варемидэява, чедари салаба ханимадавэй нив џа». Сыра' ёльчант тамна маси» џока халыком хадапсуни».

Чи, сельбя иры' ямбан' вэсаку поџгарџа. Пухуча џани' халэда сэротамбида, пэхэбида, порсам'

сертаби. Еваку џачеки џани' вэсакохоюда пили» нядабасьты-хыюда.

Тад сырэй нувода тулыд». Вэсакор поџгармамта ёльчеда, поџгамта џыдада. Еваку џачекэр џани' пили» тарча: хонёвахананта тунгус вадавна етри' самбадорџа. Вэсакохо', пухучаха' маџаха»:

–Хасава нюми' амгэ тарча? Тадебя џэвандарха.

Хуняна юркыд». Еваку џачеки ма:

–Ирикэ», юдерпанани џока илепча хора манэџадамчь. Яхакона» малхана сидя юдмян илепча» хадырџа». Тальняку тобнанту, малџэ хадаид пиркавабат.

Вэсаку манма:

–Тарем' мамбат, илепча хора' маси» тупсу». Еся џынми тания, чиканта хадри ханьявнчь ханта-накэдм. Поб, сидя хорам маси» хадаџгудм.

Ов, вэсакор ханьявнчь хая. Яля' ямбан' сыџгрёда юџгу.

Пухуча хонёда џачекым' сидеда, ма:

–Ептов, вэсакоми ханьявнчь хая, тован ни харва». Маси» џока илепча хаданакаы. Хэхэни', хабарчь нядабаџгуми».

Тад хаяха'. Нянэсяри џод» вэсакор сидя юдмян илепчам хадавы. Юдмян илепчам' мале хабармы, џаниду хабармадавэй юсида». Пухуча еваку џачеки ня хабарорчь чебџаха'. Нумда нули» пэвсюмя, амгэрт ни џадио».

Вэсакор манма:

–Та џэя, џоб, сидя џамсам' мят' тэвраџгува», џаниду хаёрџая». Хуняна џани' тутава». Сюнкакоми тания» нив. Мал мят' тэвраџгуна».

Чи, тадикад халыхад юра», џамсарим џола». Пухучар илепчаи» хоб минханта пенакосавэй тыраптайда.

Няхарсян яля хэнякы. Чикы еваку џачекэр ваванта ни хонахавапта пи' ямбан' самбадорџа. Екар», самбадорџа, екар», хынуџа.

Няхар» яля ёльчџгана, пэвсюмя няна едамту џола» џани, еваку џачеки ма:

–Ирикэ», сёнчар саво?

Сёнчами саво.

(Пелямда џадиманда газетакана толаира»)

К.И. Лабанаускас' падвы,



Тыдо' хабарпи"

Хахаяда яля' нэрэй хабартава' нямна сава юнм' падыбываць. Ма"ним" округханана" хабартавахана ня"марпада тыто' намзам' мирелевэдо'. Хэвада сава, хадерцяда ты' намза мирта – самляңг юрүэ хэвысь. Нябимдей категориян' таславы – сидя юр" самляңг ю" еся нэңгу. Ты пэртя" тарця сава юнхат ихиня маяңгудаць. Тарця нэвамда, нивамда хар"на" сэвханана" манэць таславаць.

Приуральской районхы «Паюта» хабарталаван' мале вэба' иры' нюртей яляхана тыдо' тэврамбасетыдо'. Тюку по' нод" нани' тарцясь. Нердена хабарманда хасаваюр" тым' мэтава" ирына" нердена яляхана танайдонзь. Тюку ялэ" пиркана ненэця" жокам' яхавыць.

Хэвы си"ив яляхана нани' тания' тэворүваць. Тамальүгана харе" тыда пэртя Степан Лапандер хасаюр" си"ив тым' тэвравысь. Тикахатата нэвахы намзаңэ си"ив ю" тэнда намзам' таславы". Нанидо' мал' нябимдейңэ хэвы". Тыда Константин Иванович Лапандер ня"амбада КФХам' няд"мяць мипида. Степан намгэ' пиркана тамна самляңг ю" тым' тэвраван' харва. Тыто' намзи невхы мирето' сер' ня"марпавыдо'. Намза мирелева' нямна юнм' намдаванда мальүгана ты пэртя идя вомдарахась. Ервона" вадам' нэдимдебаты нод", ты' намзам' тедари' тамна невхы мирмнанда ханлавэдо'. Тарем' нобт' тасалко"махадандо' тарця иңут' ха"мыдаць. Ервона" ватондо' нэдиво"махад пэ' тер" тыдо' ихиня тэврамба тедари' нэвадангуд". Вато' ныхын' ха"амвам' нэтеңгу". Теда' не-

нэциена" жока есям' ёпи". Степан ма"нисяв:

– Тикада вэва, тына" намза' мирм' тикаривна нидо' тамбю", вадамбой' нэдарамбидо'. Еся' тарабцо пили" со.

Яля' еркана хабартана" ненэця"



Степан тэвравы ты мал' хабармыдонзь. Сеңгалава' мякато' ядна" поңгана ненэй ненэцие



Сидяңг: М. Яр' талтавы"



нини лаханако ня"надамзь. Вячеслав Ламдо ма"нисяв:

– Тюку яля' хасаваюр" тым' тэвраць. Тикадо' саць жока ниңа". Няна" яля' вэс манзая. Сямянхат жока – сидя юр" мат" ю" тым' хабарпасетыва", та ёльцяңгана ненэсянда пэ-дасетыва". Тикава" сававна тохоловы серма", нэдьбятта тамна сэвна" хая серта пиртава".

Таняна манзарана" ненэця" илесь ёдо' сава нэвы. Тэврамбада ты" яңгоб", тэри ни" намдю", себар" сянакубц мэ"ңа", хоювна ядэрңа", ханяңы" тэри нылана". Недбядо' сава. Хабартанаңэ тарана" жокадо' нэвнандо' пон' тэхэна мэвы", серо сававна теневыдо'. Тюку по' предприятияханандо' мат" юр" тонна ты' намзам' нэдабаты серо"ңа.

Пырдары' нэдалёвана" мальүгана юнм' толаваць, округна" нэвахы ерв ма"мысь, мале тюку поход хабарталвахана тына" намзи едэй мирмня ня"марпаңгудо'. Теда' тыдо' мале хабармы" ненэцяңг" ня"амвы есьто' ирмня маси" нани няд"ма' есям' салдаңгу".

Ва"лэй не" нобт' тэвормы"

Сяхаринда не' ня"амвы манзая техэ яханда пили" тэваңгу. Нэдьбятта нод" пудана по" пыдо' ет' ханярина манзара". Поңганандо' хуркари юнета" нэдимя". Тюку илаңгана не" нюриво' ни" вадабю", мято' терри нерня' ни" минре", тикыто' ирмня яля' ня' нэдимдембада серодо' саць жока".

Тарця нина" е"эмня хэвы си"ив яляхана Санкт-Петербург маркана ненадо сер"

миңась. Тодо яхат товы" не" Евразийской форуман' ма"лыць. Няби пелядо' нани ё" тер" нэвы". Жоканда тания' сидя ёнар" ненэця" товыць. Юркад вата сидя ю" я' тер".

Пили" нерде' нэрка вадамда Россияна" Совет Федерация' нэвахана мэна Валентина Матвиенко мэ"нададь.

Ямалхадна" нэрм' тер" серо тидхалембада департамент' нэвахана мэна Ульяна Ка-

ленюк ядэрңась. Пыда выңгана ханзер" не' манзаравам' , намгэм' пэрмамдо', ханзер" илевамдо' ваде"ңась.

Тарця ненадо форумхана не' помнандо' таславандо' пили" жока нэсеты. Теда' нод" нерняңы яляхандо' сензувна сыраць пыдо' помнандо' тасалкурңаць. Тарем' нобт' тэворо"махадандо' маси" ваднанда тамна жока яля' няю' нэда сер" нэдимда".

М.Яр' падвы"

Газета «Няръяна Нэर्म»	Главный редактор Яр Марина Тэтакучевна	ГЕНЕРАЛЬНЫЙ ДИРЕКТОР АНО «Ямал-Медиа» Зулинова Мария Андреевна	№ 39 Подписано в печать 26.09.2024 г. Вышла в свет 28.09.2024 г. По графику: 16.00, фактически: 16.00.	ПОДПИСНЫЕ ИНДЕКСЫ: на год – ПА701, на полугодие – ПР562.
Учредитель – департамент внутренней политики ЯНАО (629008, ЯНАО, г.Салехард, пр-кт Молодёжи, д.9, каб.708).			Тираж 3616 экз. Заказ № 1352 (тираж 1581 экз.) отпечатан в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнуныяца, д.1, каб. 106 Фактический адрес: 629007, Ямало-Ненецкий автономный округ, г. Салехард, ул. Чубынина, 39А	Цена годовой подписки 166 руб. 84 коп. В розницу не распространяется.
Издатель – департамент внутренней политики ЯНАО (629008, ЯНАО, г. Салехард, пр-кт Молодёжи, д.9, каб.708)			Заказ № 1352/1 (тираж 2035 экз.) отпечатан в АНО «Ямал-Медиа» 629309, ЯНАО, г.Новый Уренгой, ул. Северное кольцо, стр. 2/4). Газета выходит по субботам.	Адрес редакции: 629003, ЯНАО, г.Салехард, мкр. Богдана Кнуныяца, д1, каб. 106 тел. (349 22) 4-53-32
Газета зарегистрирована – Управлением Федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО от 19 апреля 2012 года. Регистрационный ПИ № ТУ72 – 00559				E-mail: nn@yamal-media.ru